



Број: 01,02,03,03/11-05-1-2132/17

Сарајево, 30.10.2017.

ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ
S A R A J E V O

PRIMLJENO 23-11-2017			
Organizaciona jedinica	Klasifikaciona oznaka	Redni broj	Broj priloga

Izveštaj s godišnje konferencije predsjednika parlamenata zemalja Zapadnog Balkana,

Budimpešta , 27. oktobar 2017.

Predsjedavajuća Predstavničkog doma Parlamentarne skupštine BiH (PSBiH) Borjana Krišto i predsjedavajući Doma naroda PSBiH Ognjen Tadić učestvovali su na 8. konferenciji predsjednika parlamenata država Zapadnog Balkana 27. 10. 2017. u Budimpešti a kojoj su osim predstavnika Bosne i Hercegovine, prisustvovali i predstavnici: Mađarske, Srbije, Crne Gore, Makedonije, Albanije, *Kosova, te predstavnici Parlamenta Federacije BiH i Narodne skupštine Republike Srpske.

Konferenciju, koju Narodna skupština Mađarske organizira svake dvije godine s ciljem promocije evropskih i euroatlantskih integracija među zemljama Zapadnog Balkana, otvorio je predsjednik Narodne skupštine Mađarske László Kövér.

Konferencija je podijeljena na dvije sesije.

Na prvoj sesiji govorilo se o težnji i rezultatima zemalja Zapadnog Balkana u procesu integracija u Evropsku uniju na kojoj se obratila Borjana Krišto, predsjedavajuća Predstavničkog doma PSBiH, dok je na drugoj sesiji učestvovao Ognjen Tadić, predsjedavajući Doma naroda PSBiH na kojoj se govorilo o saradnji zemalja Zapadnog Balkana o doprinosu evropskoj sigurnosti.

Na marginama Konferencije održani su bilateralni susreti predsjedavajuće Predstavničkog doma PSBiH Borjane Krišto i predsjedavajućeg Doma naroda PSBiH Ognjena Tadića s predsjednicima parlamenata: Mađarske, Crne Gore i Albanije. Također je održan susret predsjedavajući oba doma PSBiH s predstavnicima Mađarsko-bosanskohercegovačkog poslovnog vijeća.

Predsjedavajuća Predstavničkog doma PSBiH Borjana Krišto i predsjedavajući Doma naroda PSBiH Ognjen Tadić susreli su se u Budimpešti, gdje se održavala 8. konferencija predsjednika parlamenata zemalja Zapadnog Balkana o euroatlantskim integracijama i o saradnji zemalja Zapadnog Balkana o doprinosu evropskoj sigurnosti s predsjednikom Narodne skupštine Mađarske Lászlóm Kövérom.

Predsjedavajuća Krišto zahvalila je gospodinu Kövéru na svemu što Mađarska kao članica Evropske unije (EU) i članica Višegradske grupe čini za BiH na putu evropskih integracija naše zemlje. S tim u vezi, posebno je zahvalila na uspješnom okončanju Twinning projekta jačanja uloge parlamenata u procesu evropskih integracija 2016. godine.

Tokom razgovora, predsjedavajuća Krišto upoznala je predsjednika Narodne skupštine Mađarske o tome da u našoj zemlji postoji stalna unutrašnja politička i pravna nesigurnost, te uskraćivanje prava konstitutivnim narodima na legitimno predstavljanje što je dovelo do presuda Evropskog suda za ljudska prava i presuda Ustavnog suda BiH koje još uvijek nisu provedene. Prema njenim riječima, ako se ne provedu prvenstveno presude Ustavnog suda BiH i ne dođe do izmjena Izbornog zakona BiH, bit će moguće raspisivanje i održavanje općih izbora 2018. godine, ali ne i provođenje izbornih rezultata. Nažalost, istaknula je, u BiH još uvijek ne postoji politička volja za rješavanje navedenih pitanja.

Predsjedavajući Doma naroda PSBiH Ognjen Tadić upoznao je gospodina Kővéra o tome da danas mnogi dijele zabrinutost za budućnost EU, naglašavajući da se u zemljama koje nisu članice EU u velikoj mjeri osjeti i prisustvo drugih svjetskih sila, a ne samo prisustvo predstavnika zvaničnog Brisela.

Ognjen Tadić prenio je predsjedniku Narodne skupštine Mađarske zabrinutost građana BiH kada je riječ o novim uslovima ulaska u EU građana iz zemalja koje nisu članice ove zajednice. S tim u vezi, Tadić je izrazio nadu da će Mađarska uložiti dodatne napore u svojoj vanjskoj politici da se takvi uslovi, ako budu uvedeni, provode u što je moguće kraćem vremenu.

Predsjednik Narodne skupštine Mađarske László Kővér istaknuo je da je Mađarska pružala i da će i u budućnosti pružati punu podršku evropskom putu BiH. Kako je rekao, to nije interes samo Mađarske, nego i drugih članica EU. Prema njegovim riječima, integracija BiH u EU značit će i ublažavanje i rješavanje mnogih unutrašnjih političkih nesuglasica u BiH.

Predsjedavajući oba doma PSBiH razgovarali su o euroatlantskim integracijama s predsjednikom Skupštine Crne Gore Ivanom Brajovićem.

Predsjedavajuća Predstavničkog doma PSBiH Borjana Krišto izrazila je zadovoljstvo time što između dvije zemlje nema otvorenih pitanja, kao i visokim nivoom saradnje parlamenata BiH i Crne Gore.

Govoreći o aktuelnoj političkoj situaciji u BiH, podsjetila je gosp. Brajovića na njegovu nedavnu posjetu našoj zemlji, gdje se, kako je kazala, imao priliku uvjeriti da u BiH hitno treba pristupiti izmjenama Izbornog zakona BiH u skladu s presudom Ustavnog suda BiH.

"Mi u BiH imamo situaciju da jedan narod bira drugome narodu člana Predsjedništva BiH i delegate u Dom naroda, što znači da hitno treba pristupiti izmjenama Izbornog zakona BiH kako bi se ta pitanja riješila, rekla je Krišto. Ako se ne dođe do izmjena Izbornog zakona BiH koje nalaže Ustavni sud BiH, onda nećemo moći provesti rezultate općih izbora 2018. godine", rekla je Krišto.

Gospođa Krišto ocijenila je da se u BiH trenutno vodi preuranjena izborna kampanja za opće izbore u oktobru naredne godine, koja je, kako je navela, obilježena populizmom i demagogijom, što u konačnici negativno utiče na reformske aktivnosti i rezultira izostankom političkog dogovora o ključnim pitanjima u BiH.

Predsjedavajući Doma naroda PSBiH Ognjen Tadić naglasio je da se svi zajedno moramo posvetiti rješavanju životnih pitanja, što bi nam, kako je rekao, mogla biti platforma za zajednički nastup prema zemljama regije. Kada je riječ o određenim političkim pitanjima u BiH, predsjedavajući Tadić upoznao je gosp. Brajovića da u BiH postoji jedinstven politički stav o članstvu u Evropskoj uniji, ali da ne postoji konzenzus kada je riječ o pristupanju naše zemlje NATO-u.

Predsjednik Skupštine Crne Gore istaknuo je da će njegova zemlja rado podijeliti iskustvo s drugima kada je riječ o euroatlantskim integracijama, te da je pred obje države posao ispunjavanja uslova i dostizanja standarda kada je riječ o pristupanju EU, što u konačnici ima za cilj i punopravno članstvo u porodici evropskih država. Svi zajedno moramo posmatrati što je najbolje za naše građane, poručio je Brajović, te pozvao rukovodstvo PSBiH da u narednom periodu posjeti Skupštinu Crne Gore.

Tokom konferencije predsjedavajuća Predstavničkog doma PSBiH Borjana Krišto i predsjedavajući Doma naroda PSBiH Ognjen Tadić održali su bilateralni susret s predsjednikom Parlamenta Albanije Gramozom Ruçiem.

Predsjedavajuća Krišto ocijenila je tom prilikom da su odnosi između dvije zemlje prijateljski i bez otvorenih pitanja, istaknuvši da to dokazuju i brojni međudržavni sporazumi, uspješna parlamentarna saradnja, kao i zajednički nastup u mnogim regionalnim organizacijama.

Kada je riječ o političkoj situaciji u BiH, gospođa Krišto upoznala je predsjednika Parlamenta Albanije da se u našoj zemlji iduće godine održavaju Opći izbori, te da do tada treba izmijeniti Izborni zakon BiH, u skladu s presudama Ustavnog suda BiH. Poručila je kako u BiH imamo puno neriješenih unutrašnjih političkih pitanja, ali da postoji jedinstven politički stav kad je riječ o pristupu naše zemlje Evropskoj uniji, istaknula je Krišto.


Predsjedavajući Doma naroda PSBiH Ognjen Tadić istaknuo je kako dobri odnosi BiH i Albanije stvaraju dobru poziciju za uspostavu sličnih odnosa i među svim ostalim državama regije. Prema riječima Tadića, ako će BiH i Albanija biti medijatori uspostave takvih odnosa, onda u vezi s nekim pitanjima dvije zemlje moraju pokazati neutralnost i konstruktivnost, bez pokušaja nametanja rješenja drugima.

Predsjednik Parlamenta Albanije Gramoz Ruçi istaknuo je da razumije teškoće s kojima se političari u BiH susreću, te izrazio uvjerenje da će za te teškoće biti uspješno pronađena rješenja. Razumijevajući različite unutrašnje stavove u BiH o mnogim pitanjima, predsjednik Skupštine Albanije izrazio je nadu da će BiH u skorije vrijeme zauzeti jedinstveni stav kad je riječ o statusu Kosova u regionalnim organizacijama.

Inače, 8. konferenciji predsjednika parlamenata zamalja Zapadnog Balkana, osim predsjedavajućih oba doma Borjane Krišto i Ognjena Tadića, iz Parlamentarne skupštine BiH prisustvovali su: Bojan Ninković, sekretar Doma naroda PSBiH, Dubravko Brdar, šef Kabineta predsjedavajuće Predstavničkog doma PSBiH, Dubravka Ištuk - Pavlović, prevodilac, Zoran Brkić iz Sektora za odnose s javnošću PSBiH, te Senaida Bešliagić i Enida Mehmedovski iz Sektora za međunarodne odnose i protokol Sekretarijata Parlamentarne skupštine BiH.

Izveštaj pripremile:
PSBiH:


Senaida Bešliagić i Enida Mehmedovski



Izveštaj odobrili predsjedavajući oba doma



Borjana Krišto



Ognjen Tadić

Dostaviti:

- Kolegiju Predstavničkog doma PSBiH
- Kolegiju Doma naroda PSBiH
- Kolegiju Sekretarijata PSBiH
- članovima Delegacije PSBiH u Interparlamentarnoj uniji (IPU)
- Komisiji za vanjske poslove Predstavničkog doma PSBiH
- Komisiji za vanjske i trgovinsku politiku, carine, saobraćaj i komunikacije Doma naroda PSBiH
- Sektoru za odnose s javnošću PSBiH
- Sektoru za međunarodne odnose i protokol PSBiH

Kopija: Ministarstvo vanjskih poslova BiH